

Meeqqanut inuusuttunullu angerlarsimaffiup avataanut inissinneqarsimasunut inissinneqarnikuusimasunullu, inersimasunngoriartornermut ikaarsaariarnermut ilisimasanik tunngavilimmik periusissatut pilersaarummik Naalackersuisut UKA 2019-imi saqqummiussinissamik peqquneqassasut, Inatsisartut aalajangiiffigisassaattut siunnersuut.

(Inatsisartunut ilaasortaq, Mikivuk Thomassen, Inuit Ataqatigiit)

Akissuteqaat

(Peqqissutsimut, Isumaginninnermut Inatsisinillu Atuutsitsinnermut Naalackersuisoq)

Siullermeerneqarnera

Naalackersuisut Mikivuk Thomassenip siunnersuuteqarneranut qujapput, siunnersuummilu meeqqat inuusuttunullu angerlarsimaffiup avataanut inissinneqarfimminniit anereerlutik inersimasunngoriartornermut ikaarsaariarnermini, malitseqartitsisarnermut ikaarsaariarnermullu nalilersuisarnissarput qulakkeerniarneqarpoq.

Inersimasunngoriartornermut ikaarsaariarnermut periusissatut pilersaarummik saqqummiisoqarnissaa pillugu Inatsisartut aalajangiiffigisassaattut siunnersuut, matumani pineqartoq erseqqissarneqassaaq periusissatut pilersaarutaammat, meeqqat tapersorsorneqarnissaannut inatsimmi malitseqartitsisarnermut malittarisassanik eqqortitsiffiususaaq.

Meeqqat tapersorsorneqarnissaannut inatsimmi malitseqartitsisarneq pillugu aalajangersakkat takuneqarsinnaapput. Malitseqartitsisarneq inuusuttuaqqanut 18-iiit 23-inut ukiulinnut atuuppoq, 18-iliinerannilu meeqqat tapersorsorneqarnissaannut inatsit malillugu ikiorserneqartussaallutik. Malitseqartitsinissamut neqerooruteqarneq inuusuttuaqqap atugarissaarneranut, peqqissusaanut ineriartorneranullu pingaaruteqartutut isigineqarpat, kommunalbestyrelsi malitseqartitsinissamik neqeroortussaasoq inatsimmi peqatigitillugu erseqqissarneqarpoq. Tamannalu nangillugu kommunalbestyrelsi malitseqartitsinissaq pillugu aalajangiisusaaq, matumani malitseqartitsinerup suussusaanut, malitseqartitsinerullu sivisussusissaanut. Taamaalillutik kommunit taakkuupput malitseqartitsinissaq pillugu neqerooruteqarnissamut aalajangiisooqarnissamullu akisusaaq. Taamaalilluni tamanna tassaavoq kommunip akisusaafeqarfia.

Naalackersuisut Mikivuk Thomassenit, meeqqat tapersorsorneqarnissaannut inatsit naapertorlugu, malitseqartitsisarneq pillugu malittarisassanik kommunit malinninersut soqutigisaqarput. Tamanna qulakkeerniarlugu, kommunit susassaarfimmi maleruagassanik periusissanillu malitassaminnik peqarnissaat pingaaruteqarpoq. Taamaammat Naalackersuisut inuusuttunut malitseqartitsisarnermut arlaatigut pilersaarusiortoqarnissaa pillugu aalajangiiffigisassatut siunnersuummut isumaqataapput, inuusuttummi 18-iliiffimminni meeqqat tapersorsorneqarnissaannut inatsit malillugu ikiorserneqartarmata.

Isumaginninnermut Aqutsisoqarfik "Meeqqat tapersorsorneqarnissaannut Namminersorlutik Oqartussat nalunaarutaannut nr. 16, 8. november 2017-imeersumut Ilitsersuummik" naleqqussaallutik nalilersuillutillu aallartissimapput, ukiup siulliup inatsisip misilittagaqarfiunera tunngavigalugu.

Taamatut naleqqussaasoqarneranut atatillugu malitseqartitsisarneq ilanngutissallugu tulluarnepaajussaaq. Meeqqanut inuusuttunullu angerlarsimaffiup avataanut inissinneqarsimasunut inissinneqarnikuusimasunullu, inersimasunngoriartornermut ikaarsaariarnermut ilisimasanik tungaveqarluni periusissatut pilersaarusiornissaq taamaalilluni ilitsersuut misissorneqareersoq aallaavigalugu suliarineqarsinnaavoq. Ilitsersuut misissoriigaq 2019-ip aallartinnerani naammassineqartussatut naatsorsuutigineqarpoq.

Matumunnga ilanngunneqassaaq, meeqqat inuusuttullu inersimasunngornissaannut pitsaanerpaamik tapersorneqarnissaat pillugu kommunit oqaloqatigineqartalereernikuummata. Isumaginninnermut Aqutsisoqarfiup 2017-imi pilersinneqarneranit inissiisarnermik suliassaqarfik kommunillu inatsisinik atuuttunik atuutilersitsinerat ukkatarineqalerpoq.

Taamatut oqaaseqarlunga Naalakkersuisut sinnerlugit aalajangiiffigisassatut siunnersuutip akuersissutigineqarnissaa inassutigaa